



## Publicaziuns dalla vischnaunca, jamna 24

### Damonda da baghegiar

**2017-1038.000**

**Datum dalla publicaziun: Ils 16 da zercladur 2017**

Il patrun: Victor Candinas, Via Cafeni 11, 7180 Disentis/Mustér

Il representant: Victor Candinas, Via Cafeni 11, 7180 Disentis/Mustér

Object: Cunfinaziun dil sulom cun in mir (enstagl seiv), parcella 3930, Via Cafeni 11, 7180 Disentis/Mustér.

- Ils plans da construcziun ein deponi tier l'administraziun communal.
- L'investa publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

*Uffeci da baghegiar Disentis/Mustér*

---

### Lubientschas da baghegiar

L'istanza da baghegiar ha concediu suandontas lubientschas da baghegiar:

**Nr. 2016 – 1023.001**

Thomas Monn, Wachterweg 3, 8057 Turitg; construcziun d'ina surbaghegiada cun pliras habitaziuns, midada da project, parcella 790, Via Veglia 3, 7180 Disentis/Mustér.

**Nr. 2017 – 1030.000**

Anna Cathrina Bossi-Huonder, Märzenbühlstrasse 15A, 8102 Oberengstringen; construcziun d'in paravent e lavurs da contuorn sin parcella 2287, Via Salez 17, 7186 Segnas.

**Nr. 2017 – 1031.000**

Irène Desax-Lienberger, Via Chischliun 1, 7180 Disentis/Mustér; plaz da seser cun tetg vetrificau e paravent, casa sin parcella 999, Via Chischliun 1, 7180 Disentis/Mustér.

*Uffeci da baghegiar Disentis/Mustér*

---

### Niev post da cussegliaziun dalla Alzheimer a Mustér

Avertura dil post da cussegliaziun cun il referat da dr. Raimund Klesse «Gut leben mit Demenz», presentaziun dall'associaziun Alzheimer Grischun e silsunter in pign apéro.

**Venderdis, ils 16 da zercladur** allas 19.30, Puntreis Center da sanadad SA a Mustér

Tuts interessai ein cordialmein envidai dalla Puntreis Center da sanadad SA e dall'associaziun Alzheimer Grischun.

---

### Parcadi sutterran a Sogn Gions

#### Affittaziun

La vischnaunca posseda el center dil vitg, el sutterran da Puntreis, entgins parcadis. Quels san vegnir affittai naven d'immediat ni tenor cunvegnientscha per frs. 120.–/meins.

Interessents che giavischan d'affittar in parcadi san bugen s'annunziar tier igl uffeci da baghegiar, caum postal 57, 7180 Disentis/Mustér ni per e-mail: [baghegiar@disentis.ch](mailto:baghegiar@disentis.ch).

*Suprastonza communal*

---



## Plan da quartier Vitget Crestas al Crest d'Acletta

### Publicaziun ed exposiziun officiala

Sebasond sin art. 51–53 dalla lescha davart la planisaziun dil territori pil cantun Grischun (KRG/LPT) ed art. 18 e 21 dall'ordinaziun davart la planisaziun dil territori pil cantun Grischun (KRVO/OPT) vegn publicau ufficialmein suandonta documentaziun en connex cun la revisiun dil plan da quartier Vitget Crestas al Crest d'Acletta:

- Plan da quartier, plan da formaziun 1:500
- Plan da quartier, plan d'avertura 1:500
- Plan da quartier, regruppament da terren cun partiziun nova 1:500
- Prescripziuns tiel plan da quartier Informativ
- Plan da quartier, regruppament da terren 1:500 dils 3 da december 2012

Dil plan da quartier Vitget Crestas al Crest d'Acletta sa vegnir priu envesta duront 30 dis naven dils 16 da zercladur entochen ils 17 da fenadur 2017 en casa communal, Via Cons 2, 7180 Disentis/Mustér (stanza 10) duront las uras da spurtegl.

Duront il temps d'exposiziun sa vegnir fatg protesta alla suprastanza communal, caum postal 57, 7180 Disentis/Mustér. La protesta sto vegnir inoltrada a scret ed ei da motivar. Legitimai d'inoltrar ina protesta ein personas che san far valer enviers la planisaziun da quartier interess persunals, digns da vegnir protegi ni ch'ei legitimai leutier sin funda-ment dil dretg federal.

*Suprastanza communal*

---

### Cussegl da vischnaunca

#### Rapport dalla seduta dils 8 da zercladur 2017

En sia seduta dils 8 da zercladur 2017 ha il cussegl da vischnaunca sut il tgamun da Christoph Berger tractau pliras fatschentas.

Dapi liung temps discuoran ils exponents politics e turistics davart in project surregional San Gottardo. Ei setracta d'in project da svilup che duei promover cun sustegn dalla confederaziun e dils cantuns pertuccai la collaboraziun turistica sin differents secturs. Denter auter duein il sport da cuorsa liunga, denton era la collaboraziun intensiva ella regiun dil Gottard denter las pendicularas e las regiuns da skis vegnir intensivai. In impurtont pass en quei sector ei la fusiun dallas Pendicularas da Tujetsch cun las Pendicularas d'Ursera tier la societad Andermatt Sedrun Skiarena. L'intenziun ei denton era da colligiar il territori da skis da Mustér cun Tujetsch.

Igl acziunari principal dallas Pendicularas Mustér SA vesa en la colligaziun in augment considerabel dalla purschida turistica igl unviern, denton principalmein era la stad. Cun quella pendiculara duei buca mo la purschida pil sport d'unviern vegnir pli attractiva, mobein era igl access el territori da viandar e spassegiar vegnir cumpletaus. Quei project sa era esser ina buna alternativa el cass d'unviarns cun pauca neiv el fons dalla val. Sper la colligaziun cun la pendiculara eis ei previu da realisar el territori dalla nova staziun da muntogna in runal enviers la staziun da muntogna dalla sutgera dil Parlet. Per quei intent han las Pendicularas Mustér SA inoltrau agl uffeci federal da traffic ina damonda da concessiun per la realisaziun d'ina pendiculara naven da Salins entochen sil Péz Las Palas. L'exposiziun officiala davart il project da concessiun ha giu liug naven dils 3 da fevrer entochen ils 6 da mars 2017.

Ferton che cantun e Regiun Surselva ein responsabels per la revisiun dalla planisaziun directiva, cumpeta la responsabladad per la revisiun dalla planisaziun locala – la planisaziun da nez – alla vischnaunca. La vischnaunca da Tujetsch ha per quei intent approbau alla votaziun all'urna dils 21 da matg 2017 la revisiun parziala dalla planisaziun locala concernent l'adattaziun dil plan da zonas e dil plan general d'avertura dalla vischnaunca da Tujetsch per la colligaziun dils territoris da skis Sedrun-Disentis/Mustér (pendiculara Salins-Cungieri- Cuolm da Vi).

Ord vesta dalla suprastanza communal setracta ei d'in project da gronda muntada per la destinaziun turistica Sedrun Mustér. Nus essan perschua di ch'igl investur che ha iniziou quei project ei intenziunaus da realisar quel ton pli spert, sco quei ch'el ha era gia priu a mauns auters projects da gronda muntada. La vischnaunca da Mustér ha gia decidu ils 27 da november 2016 da sustener la colligaziun cun la pendiculara denter Mustér e Sedrun cun in emprest da 2,5 milliuns francs. Il pass logic ei pia quel da crear la basa planisatoria per che quell'ovra sappi vegnir realisada.



Il cussegl da vischnaunca ha approbau la revisiun parziala dalla planisaziun locala concernent l'adattaziun dil plan da zonas e dil plan general d'avertura dalla vischnaunca da Mustér per la colli-giaziun dils territoris da skis Sedrun–Disentis/Mustér (pendiculara Salins-Cungieri-Cuolm da Vi). El senn digl art. 11 al. 1 dalla lescha da baghegiar vegn la revisiun dil plan da zonas suttemessa ils 24 da settember 2017 alla cuminonza dils votants.

Plinavon ha il cussegl da vischnaunca priu enconuschientscha dil program d'actividad e dil plan da finanzas 2018–2022.

*Suprastonza communal*

---

## **Controla da habitonts**

### **Mortori**

Comello Armando, naschius ils 6 da fevrer 1946, morts ils 12 da zercladur 2017

---

## **Onn da scola 2017/18**

Preziai geniturs, cars affons

Ils uraris da scola ed igl urari dils transports pil proxim onn da scola 2017/18 ein d'anflar naven d'immediat sin [www.scoladisentis.ch](http://www.scoladisentis.ch). Jeu supplicheschel tutAs scholarAs da Segnas da s'annunziar cun ina foto da portret silla staziun da Mustér pigl abbonament dalla MGB. Nus engraziein a Vus cordialmein per la buna collaboraziun duront igl onn da scola che va alla fin e giavischein bialas vacanzas da stad.

Cordials salids e sin bien seveser

*nossa scola populara Mustér*

---

## **Café da sentupada/Begegnungscafé**

**Dienstag, 20. Juni 2017**, 17–19 Uhr im Gemeindezentrum Aua Viva Disentis.  
Begegnung und Gespräch mit Asylsuchenden aus dem TRZ Bellavista.

*Evang.-Ref. Kirchgemeinde der Cadi*

---

## **Uniun da catschadurs péz alpetta salvament d'anseuls**

### **Preziai purs**

Ussa ei il temps che las cauras cavriel fan ansiel. Stedi setegnan ellas si cun lur anseuls en praus che vegnan segai. Aschia vegnan mintga onn anseuls per la veta entras maschinas da segar. Cun pign engaschi san ins evitar quei. Purs che fan fein en loghens nua che cavreuls setegnan si, ein supplicai da s'annunziar tier nus in di avon che segar. Aschia savein montar mintgamai ina bandiera el prau pertuccond. Entras il disturbi da quellas prendan las cauras ils anseuls ord il prighel. Annunzias saveis fartier il cau da tgira sut la numera 079 304 33 61.

Bien engraziament per Vossa collaboraziun.

*Uniun da catschadurs Péz Alpetta: il cau da tgira*

---



### Preavis fiera da Nadal 2017

#### Da cuminonza el futur

Prezias expositurs, las uniuns da dunnas da Tujetsch Medel/Lucmagn e Disentis/Mustér ein sedecidas d'organisar communablamein la fiera da Nadal. La fiera vegn organisada alternond en ina ni l'autra vischnaunca. L'organisaziun schai mintgamai els mauns dall'uniun da dunnas dalla vischnaunca nua che la fiera ha liug. Uonn ha la fiera liug **sonda, ils 25 da november 2017**, dallas 13.30–20.00 a Mustér e vegn organisada dall'uniun da dunnas Disentis/Mustér. Per dapli informaziuns e per l'annunzia contactein Vus il meins d'uost el num dall'uniun da dunnas Disentis/Mustér, Rita Huonder e Tina Bundi, tel. 081 947 52 81 ni email [tina@corsinbundi.ch](mailto:tina@corsinbundi.ch).

*Uniuns da dunnas*

*Disentis/Mustér – Tujetsch – Medel/Lucmagn*

---

### Controllas apparats d'udida

**Gliendisdis, ils 26 da zercladur 2017** saveis Vus schar schubergiar e rugalar Vies apparat d'udida:

9.00–10.30 en Casa sogn Martin a Trun

11.00–11.40 en Casa sogn Giusep a Cumpadials

13.15–14.30 el Puntreis, Center da sanadad a Mustér

Las firmas Amplifon cun dunna Roffler e Jäggi cun signur Gfeller sorprendan communablamein quei survetsch gratuit per tuts interessents. Ei drova negina annunzia.

---